

名医类案约编

11

52.



續名醫類案約編卷中

陶初許勉煥澹從氏纂

伴梅主人梅 洽 編

驚悸

林祥子四歲臘月破爆竹驚死拿甦如父母喚聲畧重又驚死與飲食時先以食示之再做聲便不驚其父亦業幼科投以棗仁遠志等味不效至予告其顛末予曰此膽家受病作心家醫悞矣余授以參竹湯二劑而愈

幼科鍊鏡

一小兒二三歲身熱驚悸易醫六七俱無寸效一日

忽作鴉聲少頃其音已啞魚口開張予視之欲哭狀
惟眉頭稍縐終無淚出心甚憐之細思其策因以指
探其口唇乾舌燥予曰心熱欲言而不能果有之乎
卽以黃連黃芩石膏麥冬五味山梔元參花粉知母
甘草薄荷燈心竹葉剉一大劑煎成薄膏頻頻服之
一晝夜而鴉聲復出又一日而音始全而愈自此之
後此法活人無數大便三四日不行者加元明粉二
三錢尤驗驚悸者加金子同煎嗟乎人遇啞驚風俱
棄之而不治孰知舌乾唇燥終屬陽症此法甚善故

記之

醫宗說約

一小兒煩躁驚悸熱渴飲冷額間色赤此心經實熱所致先用瀉心湯一服稍緩又用柴梔子散而瘥

先究

集

怔忡

一小兒四肢冰冷驚悸怔忡沉默倦怠此胃氣虛而外感風邪也先以八物祛風散表其風寒調其胃氣而手足猶覺微冷必用六君子湯服二劑諸症方得全安

百代醫宗

中酒

陳州長吏一小兒病寐而不寤一日諸醫作睡驚治



医药大学图书馆藏

之或欲以艾火灸之或以大驚丸及水銀餅子治之
其父曰此子平日無疾何驟有驚乎以子之病乃問
於戴人戴人診其兩手脈皆平和戴人曰若驚風之
脈當洪大而強今則平和非驚風也戴人竊問其乳
母爾三日前曾飲醉酒否遽然笑曰夫人以煮酒見
餉酒味甚美三飲一罍而睡陳酒味甘而戀膈酒氣
滿乳兒亦醉也乃剉甘草乾葛花硝砂仁貫衆煎汁
使飲之立醒

儒門事親

一小兒昏睡不醒竟日舉家驚惶求醫投藥罔效一
高醫診之曰此兒中酒得母乳母曾病飲乎詢之果

然停藥而醒可見其利害相關明矣

馮氏錦囊

喜笑不休

一小兒喜笑常作不休面赤飲冷手足並熱先用黃連瀉心湯末二服稍定又用六味地黃丸料煎服頓愈常服此丸則安月許不服仍復作又服愈矣

證治準繩

悲哭

張鼎石子少乳求有乳婦人爲乳母年未一週病啼哭晝夜不止請予治之予曰腮頰目赤乃心煩啼哭也用導赤散加黃連麥門冬燈心煎服之次日問曰昨夜哭更多何也予曰病安矣啼哭三日夜不乳昨

夜熱退心涼欲得乳而乳母在外故知往夜之哭病哭也昨夜之哭飢哭也果如是

萬氏醫書

汪懷江生子二月啼哭不止亟請予視之予曰此必肝熱也以瀉青丸竹葉湯入砂糖少許調服而安

同上

朱廣函女二歲時至夜半忽然啼哭叫跳不住意其胸腹作痛將刷子蘸香油刮之痧起不藥而愈

痧脹玉衡

一小兒一歲啼哭不止予審察之非病也其父母曰無病何以啼哭異常予乃問其乳母此兒平日戲玩者何物乳母曰馬鞭子卽以取至兒見大笑擊人而

哭止

萬氏醫書

停食

一小兒傷食噎腐用平胃散一服宿滯頓化余云不必多藥但節飲食自愈

薛氏案

一小兒傷食發熱抽搐嘔吐喘嗽屬脾肺虛氣虛有熱用六君加炒黑黃連梔子而愈

萬病回春

噎氣下氣

一小兒十三歲面赤驚悸發熱形體羸瘦面白不時噎氣下氣常停食服保和丸及清熱等藥余曰面赤驚悸心神怯也面白噎氣心火虛也大便下氣脾氣虛也此皆稟心火虛不能生脾土之危症前藥當禁

不信又服枳朮丸涼驚等藥而諸症益甚大便頻數
小腹重墜脫肛痰涎飲食日少余先用六君子湯爲
主佐以補心丸月餘飲食少進痰涎少止又用補中
益氣湯送四神丸而愈畢姻後復病仲冬面白或顰
色手足冷喜食胡椒薑腹中不熱脈浮按之微細兩
尺微甚乃用八味丸元氣復而形氣漸充年至二十
苦畏風寒面目赤色發熱吐痰唇舌赤裂食薑之物
唇口卽破痰熱愈甚腹中卻不熱診其脈或如無或
欲絕此寒氣逼陽於外內眞寒而外假熱也仍用八
味丸而諸症頓愈

證治準繩

吞酸

一小兒吞酸用六君子湯而愈後傷食復作兼瀉先用五味異功散加升麻乾薑瀉頓止又以六君子煎送四味茱萸丸而後愈

薛氏案

一小兒吞酸噯腐發熱口渴先用保和丸二服以消宿滯又用六君子木香乾薑以溫養中氣而愈後傷冷粉腹脹痛余用異功散加乾薑諸症漸愈用補中益氣湯加木香將愈又傷食吞酸腹痛用六君子木香二劑痛止又四劑而愈

薛氏案

腹脹



医药大学图书馆藏

一小兒不時乾嘔乳食不進肚腹膨脹其形如來蛇
此脾胃虛而成疳也用四味肥兒丸治疳佐以四君
加蕪荑健中而痊後傷飲食吐瀉完穀形氣甚困四
肢微搐視其形如去蛇余曰且不用藥次日吐止但
搐而瀉青此脾土虛而肝木勝用六君子湯加鈎藤
鈎治之而痊

晴川先究集

龍子脾虛腹脹面黃服補脾及消導皆不效六脈沉
濡此脾胃多濕症以平胃散治之蒼朮米泔浸一宿
晒炒香附瓦器炒各四兩陳皮厚樸薑汁炒各二兩
右爲末老米糊丸梧桐子大每日飢時以白水或米

飲送下七八十丸藥未盡而愈

醫案大觀

一女甫三歲因食積面青黃羸瘦脫形腹大項軟終日沉睡症雖危甚猶幸能食差有生機予用扶養消積之劑再吞加減蘆薈丸遂大泄不止予曰此積氣方動必待下污穢之物泄轉甚病乃轉愈耳頃之果下糞如絲瓜穰臭不可聞泄差止乃與四君子湯數劑而愈

醫穀

腫脹

沈啟庭孫甫三歲脾虛發腫兩足更甚乳食不思午後發熱頭面羸瘦俗醫云此病如用官料藥便成發

黃鼓脹而死但當服草頭藥并以針挑其指出黃水
自愈浙西人言出醫家藥籠中者謂之官料藥俗傳
單方一二味謂之草頭藥婦女酷信此說不讀書者
從而和之往往以此悞事啟庭力排此說延予調治
予曰此脾虛也非參朮不能收功病已發黃鼓脹將
死矣草頭藥何以治之且官料藥皆草根樹皮也何
出自醫家便爲官料啟庭信而服之漸有回色未幾
又發瀉又頭上生毒爛至見骨又出瘡皆極重病纏
綿不休予一於補正他病見則隨症稍加減之如是
者自夏迄冬盡用參幾觔餘纔得脫體次年始長肌

肉設惑於衆論能有救否

高鼓峰

萬邦瑞一女年十四歲病腫寅至午上半身腫午至戌下半身腫亥子丑三時上下腫盡消惟陰腫溺不
得出諸醫不識其病邀予治之予曰此腎肝二經病
也腎者水臟也亥子丑之時水旺之時也肝屬木腎
之子也水生於亥子丑二時肝膽氣行之時也足厥
陰肝經之脈環于陰氣故當其氣行之時陰腫而溺
不得出也水在身中隨氣上下午時已前氣行於上
也故上半身腫午時已後氣行于下也故下半身腫
此病源也五苓散瀉水之藥也經曰諸濕腫滿皆屬

脾土平胃散燥濕之藥也故以合之名胃苓湯加生薑皮之辛熱助桂枝陳皮以散肝經之邪茯苓皮之甘淡助猪苓澤瀉以滲泄腎經之邪防已之通行十二經以散流腫上下之邪也服十餘劑而愈

萬氏醫書

治一小兒忽遍身浮腫此俗名河白乃溢飲也用旋

覆花湯兩發汗而愈

證治大還

腹痛

先生子寶臣十二歲時中秋飽食當風臥初腹腫痛以胃風湯二三劑治之稍愈四五日腹大痛堅如石筋青似鼓狀治痰治積治血治臟俱不效鳩尾上下

橫亘一塊斜連侵腹約尺二三寸許先生曰奇疾予
頗能療何當局而迷耶約半年餘不但食減食至前
大痛而吐矣先生曰嘻向予亦錯認耶鼓掌恍然悟
集殺虫藥三十味以輕粉製過雜大黃夜投魚汁中
誘之進藥五錢五更瀉至天明約虫斗餘至午後霍
然言笑而大虬徐出長二尺餘大幾如筆幹先生曰
此惡孽不出吾子死其吻矣夫

金少游

一女年十三歲病少腹時痛已四年矣面目肌膚皆
浮而黃食減神衰諸醫輩作熱作虫作食積或健脾
開胃雜投幾番全無功效延余診得脈來遲而全無

力作以寒濕用附子乾薑厚樸蒼朮防己木瓜十劑而全 脈症正宗

一小兒腰曲啼叫右顙色青黑此臍腹內痛卽盤腸內吊也因脾土虛寒肝木來乘故耳用六君子加木香鈎藤鈎頓痊 晴川先究集

心痛

丹埠張氏兒十歲自幼心痛得於母氣不時發者發時飲食不進呻吟反覆三四日仲淳疏以枳榔黑丑木香使君子橘紅白茯苓白芍旋覆花猪苓藥入口

卽止 廣筆記